



INTACH MIZORAM CHAPTER

Kumin January thlaa Vanbawng leh North Khawlek khaw inkar Thingkhuang Ngaw Pûk chhunga ruhro hmuh chhuahte chu Carbon 14 Dating hmangin kum AD 1260 - 1320 inkara mite an ni tih chhût chhuah a ni.

INTACH Mizoram Chapter hruaitute chuan vawiin khan Aizawl Press Club-ah Thingkhuang Ngaw Pûka ruhro hmuh chhuahte zirchianna chungchang thuthar thehdarhtute an hrilhfiah a; ruhro hmuh chhuahte hi Beta Analytic Laboratory, Miami, USA- ah thawn niin, result an rawn thawnah ruhrote hi kum AD 1260 - 1320 inkara mite an ni tih tarlan a ni a; tute nge an nih a, eng hnam leh thlahte nge an nih hriat nan hmalak mek a ni bawk.



HEROIN SEIZURE

Kum 25 chhungin Mizoramah heroin kg 248 chuang leh methamphetamine kg 575 chuang man a ni a; kuminah January - July thla chhung khan heroin kg 26 chuang leh meth kg 155 chuang man a ni tawh.

Excise & Narcotics Minister Pu Lalnghinglova Hmar chuan Assembly session neih zawh takah khan MLA Pu Clement Lalhmingthanga zawhna ziaka chhangin, Excise & Narcotics department chuan kum 2000 - 2024 (kum 25) chhung khan heroin kg 248.115 leh methamphetamine kg 575.614 man a nih thu a tarlang a; heroin leh meth man zat hi kum 2019 atang khan a pung nasa hle a ni.

Excise Minister tarlan dan ah hian kum 2019 hma lam kha chuan heroin hi kum khatah kg 10 aia tam man a awm ngai lo a, kum 2019 hnu lamah erawh kum tin kg 10 chunglam vek man niin, kum 2023 pheih kha chuan kg 76.058 man a ni a, kum 25 chhunga heroin man tam ber kum niin, kumiah thla 7 chhungin kg 26.214 man a ni tawh bawk.

Meth hi kum 2019 hma lamah khan kum khatah kg 6 aia tam man a ni ngai lo a, kum 2019 hnulamah chuan kumin thlengin kg 12 - kg 155 inkar man thin a ni tung. Kumin kum kalmekah January - July (Thla 7) chhung khan meth kg 155.824 man a ni tawh a, thla 7 chhung lek hian kumin hi Mizorama meth man tam ber kum a ni tawh a ni.



MGNREGA

Ni 100 inhlawhna Mahatma Gandhi National Rural Employment Guarantee Act (MGNREGA) hnuaia inhlawhnate mipuiten an endik theih nan sorkar kum kal mek 2025-26 chhung hian khaw 269-ah social audit neih a ni tawh a; social audit kaltlang hian a nih dan tur ang ni loa hnathawhte hmuhchhuah thin a ni.

Rural Development Minister Prof. Lalnilawma chuan Assembly Session neih zawh takah khan MLA Jeje Lalpekhlua zawhna ziaka chhangin, sorkar kum kal mekah khaw 269-ah social audit hi neih zawh a nih tawh thu te, August thla atang khan khaw 200-ah kalpui leh mek a nih thu leh kum 2024-25 chhung khan Mizorama thingtlang khua zawn zawng (khaw 874)-ah social audit hi neih a nih thu te a tarlang a ni.

Prof. Lalnilawma chuan social audit kaltlangin ni 100 inhlawhnaah hian a nih dan tur ang ni loa hnathawh hmuh chhuah a awm thin thu a tarlangin, henge hi social

audit kaltlang vek hian siamthat nih thin thu leh pawisa inbuk tawh lote a awm pawhin a inbuk tawh loh nate chu sorkarah chhun let a nih thin thu a tarlang bawh.



RBI AIZAWL

RBI Aizawl General Manager Officer in Charge Pu T Lhungdim chuan vawin khan Saitual PCI, Chhim Veng Hall-ah 'Saturation Camp for Financial Inclusion Schemes' leh 'Re-KYC cum Field Level Financial Literacy Programme' a hawng.

Camp-ah hian digital banking, lungawi lohna chinfel leh sum leh pai chungchang inzirtirna ngaih pawimawh leh zual a ni a; Saitual khawtual atangin mi 100 chuang telin, sawrkar laipui flagship scheme hrang hrang - PMJDY, PMJJBY, PMSBY, leh APY a inziak lut thar tur leh KYC tih that ngaite an tel a ni.

RBI GM Pu T Lhungdim chuan, KYC tih thar lehna hmalakna hmang hian customer-ten PMJDY account leh social security scheme hrang hranga hamthatna awm theite an dawn phah thei dawn tih a sawi.

Camp-ah hian Saitual District-a SBI, MRB leh MCAB-a thawktu hrang hrangte leh Lead District Manager te kaihhruainain document 100 chuang endika tihfel a ni a, social security scheme leh insurance hrang hranga inziak lut tam tak an awm bawh.



HIV TEST DRIVE

Vawin khan HIV chungchang inhrilhriatna leh district chung ah HIV test drive beihpui thlak thawhnihna tur chu District Bawhsap Pu VL Hruaizela Khiangte chuan a hawng.

'Intensified IEC Campaign & HIV Test Drive Campaign' phase -2 hawna programme ah hian Khuallian District Bawhsap Pu VL Hruaizela Khiangte chuan thusawin, HIV hri chu mitinin hre mahse inzirtir an la ngai hle a ti a. Mizoram chu HIV vei an sawi chuan a chhuanawm lova, a bik in Siaha district an hmingthan dan a mawilo tih sawin thalaiten kawng tha an zawh theih nan theihtawp chhuah a tul thu a sawi a, zirlaite chu an inngahna ber ani tih sawin inngahna tlak ni zel turin a chah a, Sorkar leh Tlawmngai pawl ten hma la in theihtawp chhuah mahse an tanrual loh chuan awmzia a awm lova, Ruihlo leh Hri chhia do kawng ah an tanrual a pawimawh takzet a ni a ti bawh.

Siaha District ah hian khaw 25 ah kalpui tur niin, September leh October thla chung ah kalpui tura ruahman a ni.

